

LE
CONSEIL

DE
SAINT GERMAIN
EN LAYE.

SVR LES AFFAIRES
DE PARIS.



A PARIS,
Chez la vefue d'ANTOINE COVLON, rue
d'Escoffe, aux trois Cramailles.

M. DC. XLIX.
AVEC PERMISSION.

LE CONSEIL DE SAINT Germain en Laye, sur les affaires de Paris.

MONSIEVR LE DVC D'ORLEANS.

DANS l'estat present des affaires, ie vous auouë, Illustre Conseil, que mon esprit se treuve tellement surpris, & si fort espouuanté, que ie ne sçay quasi que penser, encore moins que dire & que resoudre. Sur le point de donner icy quelque conseil salutaire, ie ne sçay plus que deuenir moy mesme, & i'entens de tous costez gronder vn foudre, que ie ne croy pas que nous puissions euitier. Soit que ie considere nostre foiblesse, ou la force des Parisiens, ou que ie iette les yeux sur la justice de leur cause, & sur le crime de la nostre: tout est gagné pour eux, & perdu pour nous. Et de fait, Conseil Illustre, nostre procedé est-il équitable? Enleue-t'on les Rois à leurs peuples sans vne espeece de sacrilege? N'est-ce pas voler aux Autels leurs choses saintes? N'est-ce pas raur à Laban ses Dieux? Avec cette insigne difference que Rachel n'auoit pris que des faux Dieux à son pere, & que nous rauissons les legitimes Dieux des François. Aussi deuons nous croire que comme d'autres Labans ils nous poursuiuront par tout le Monde, pour nous arracher le tresor que nous leur auons volé. En ce rencontre, Illustre Conseil, ie serois le Iacob qui abandonneroit à leur zele l'Autheur de ce sacrilege, si je n'auois encore quelque affection pour Monsieur le Cardinal. Car apres tout, ie ne voy point d'esperance qui nous reste. Le Ciel nous abandonne & les fauorise; & le malheur est que dans nostre malheur mesme ie ne voy rien que de raisonnable. Nous meritonstous les maux que nous endurons; & la crainte de ceux qui sont à venir est en nous vn redoublement de douleurs, que i'estime vn iuste supplice. Mais quoy, Monsieur le Cardinal s'attriste! Vous fremissez, illustre Prelat! cessez, cessez vostre frayeur; ie vous montre vn peril où ie ne

vous expose pas. Vous abandonner à la rage du peuple, ce seroit vous perdre pour nous sauuer, & chercher bassement nostre salut dans vostre ruine. Faisons mieux, & sauons nous tous à la fois. Rendons aux Parisiens leur Monarque. Contentons l'aide & la noble passion d'un peuple fidele, qui ne respire que le seruice & la veuë de son Prince; Ils ne demandent autre chose. Quand leurs desirs seront comblez, ils nous pardonneront: & leur redonnans leur Roy, l'objet de leur plus ardent amour, nous estoufferons leur plus violente haine.

M^r LE PRINCE.

Le conseil de Monsieur le Duc d'Orleans est iuste, illustre Senat, mais il n'est pas glorieux. Pardonnez moy, Monsieur, si ie dis que rendre le Roy aux Parisiens est vne bassesse plus grande que la faute de le leur auoir osté n'est criminelle. C'est vne indignité extreme en vn genereux courage que le regret d'auoir commis quelque action que ce soit; & les Princes sont des Dieux, qui doiuent ne s'en dédire iamais. Il faut donc garder le Roy pour nostre gloire; & vaut mieux perir de cette sorte que de viure d'une autre.

LE CARDINAL.

Cette resolution est digne du rang que vous tenez, Monsieur, & de l'estat où nous nous treuons. Par là vous soustenez & vostre grandeur & nostre cause, que Monsieur le Duc d'Orleans abandonne. Quoy, Monsieur, vous voulez que nous ramenions le Roy à Paris? si nous éprouuons icy quelques maux, en seroit-ce là vn remede? Ne craignez vous point la rage du peuple: & la furie de ce monstre à tant de testes, qu'on ne peut iamais toutes appaiser, & dont on peut encore moins se defendre. C'est au moins me conseruer d'une estrange sorte que de me mettre à la mercy de tant de furies: Mais ie ne crains pas pour moy, Monsieur, ie crains pour vous, dis je, qui auez si souuent abusé le Parlement, qu'il est bien difficile qu'on vous pardonne. Ne faites point en ce rencontre bouclier de vostre naissance: vne populace animée ne respecte pas mesme les Rois legitimes, & se vange sur tous, sans épargner les choses insensibles. Ie voy bien que la crainte du moindre danger

vous fait coufir au plus redoutable : Mais, Monsieur, perdez vne vaine terreur, qui vous aveugle & vous veut mener dans vn precipice. Entrons plûtoft tous ensemble dans les illustres sentimens de Monsieur le Prince. Perifsons genereusement s'il faut perir. Courons à toutes autres extremitez, & fuyons celle-là de nous aller exposer à la fureur de nos ennemis. Voila, Monsieur, ce qu'il nous faudroit faire si nous estions reduits en l'estat que vostre crainte s' imagine. Mais si nous auons quelque chose à craindre, il nous reste bien dauantage à esperer. Iusques icy nos ennemis n'ont combattu que la necessité. Tous leurs progres ne sont que pour du pain. Miserable victoire, qui ne recherche qu'à viure; & triste combat qui ne souhaite que la defense: encores ces malheureux ne se defendent-ils qu'en tremblant; & cependant il semble que nous ayons autant de peur comme eux. Ie sçay bien que comme les mauuaises actions ne sont que trop suiues & trop imitées. La rebellion des Parisiens treuuera par toute la France assez d'imitateurs. Nous voyons déjà comme les Prouinces les suiuent; & c'est ce qui vous épouuante. Mais, Illust. Cōseil, quand les maux sont extremes, il faut courir aux extremes remedes, & quitter les doux. Chastions ces rebelles François des verges de leurs ennemis; appellons l'Archiduc Leopold & le Duc de Lorraine, pour punir cestemeraires. Il vaut mieux payer leur secours de quelque partie de nos conquestes, que de ceder à des insolens l'honneur de nostre déroute & de leur victoire. Au reste comme ils sont resolu de tout perdre, il ne faut pas que leur desespoir l'emporte sur nostre prudence; & i'estime qu'il vaut bien mieux, comme sages Medecins, sauuer le corps par la perte de quelque membre. A ce prix nous aurons des forces suffisantes pour punir l'audace de nos mutins, & conseruer l'éclat de nos dignitez.

LE CHANCELIER.

Monsieur le Cardinal ne manque iamais de bons aduis, illustre Conseil, dans l'extremité des affaires; le prompt expedient qu'il propose est vn effort de iugement & de prudence incomparable. I'estime donc qu'il faut suiure son conseil, ou tout perdre. Car nous ne sommes point assez forts pour resister aux ennemis, & nous n'esperons point de secours d'aucun endroit de France: tellement qu'il
 en faut

en faut chercher ailleurs. Le dessein de ramener le Roy à Paris de quelque costé que ie le considere est si dangereux & si peu honorable, que nous ne le pouuons faire sans rougir tout à la fois de sang & de honte. Ainsi le secours estranger est le seul & le digne dessein que nous deuons former.

LA MESLERAYE.

Les affaires, Conseil illustre, sont en vn estat bien déplorable s'il nous faut haïr nostre patrie, iusques au point de l'exposer en proye à ses ennemis. Je ne suis pas le moins interessé en ce rencontre, chacun sçait bien comme on me mal traite en Bretagne; & nul n'ignore comme l'on me hait à Paris. Mais quel'on pille mes biens & quel'on demande ma vie n'importe; j'aime mieux tout pendre que de perdre ainsi mon païs. L'auouë bien que si en appellant l'Estranger en France, nous pouuons simplement reprimer l'audace des Parisiens, sans procurer tout ensemble leur ruïne, j'en serois bien aise: Mais ie n'ay point contr'eux de haine si forte, que ie souhaite de les voir exposer à la mercy de l'enuie Espagnolle, pour ma vengeance. En ce rencontre donc, Conseil illustre, ie suis capable de me resoudre à tout autre chose, mais non pas à cette espede de perfidie. Je voy bien toutes choses des mesmes yeux dont on les regarde: Je sçay bien que nostre party va bien tost succomber sous la multitude des ennemis qui nous environnent; Je sçay trop que nos propres freres & nos meilleurs amis, ont vaincu l'amitié & surmonté les affections du Sang & de la Nature, pour embrasser la querelle de ceux qui nous font la guerre. Je voy bien plus; car le Ciel abandonne visiblement nostre cause: mais de nos maisons ainsi diuïsées, si quelque partie doit perir, qu'en perissant au moins elle establis le salut de l'autre. N'appellons point à nostre secours des defenseurs qui nous accableroient tous ensemble, & triompheroient des vaincus & des vainqueurs tout à la fois. C'est là les sentimens que doiuent eternellement conseruer ceux qui ne sont pas ennemis de la France, ny Partisans d'Espagne.

Mr LE PRINCE.

Je suis de cét aduis, & ie ne sçauois me resoudre aux extremi-

rez où Monsieur le Cardinal se porte. Vous nous apprenez, Monsieur, par vn si estrange remede la cruelle playe que nous nous sommes faite par nostre imprudence. Deuions nous sortir de Paris comme nous auons fait, sans estre assurez d'aucune bonne retraite; sans auoir vne armée suffisante toute preste; sans secours, qui au besoin nous fust assuré. Nous nous sommes abandonnez au gré d'vne aveugle fortune. Nous nous sommes iettez dans vne mer capricieuse pleine de vents & d'orages, sans tymon, sans voile, ny sans cordages, & sans auoir preueu les dangers. Nous auons abandonné vn port où nous ne pouuons plus retourner. Nous éprouuons aujourd'huy combien le sage doit peu s'asseurer sur de vaines esperances; & combien c'est vne chose indigne d'vn Politique prudent de n'auoir qu'vn seul fondement, & encore estably sur des euenemens incertains. Nous croyons que le desordre de Paris nous donneroit vne victoire indubitable: mais il falloit aussi penser que comme dans la police les contraires s'engendrent les vns les autres: aussi de cette confusion il pouuoit naistre vn ordre à nous plus dangereux que leur desordre ne leur seroit contraire. Et dans cette pensée il falloit se munir d'ailleurs. Si nous ne l'auons pas fait toutefois, & qu'en cela nous ne puissions estre excusé d'vne grossiere faute, il ne faut pourtant pas la redoubler & refaillir. Vne erreur en attire ordinairement vne autre; mais elle ne la iustifie point; & enfin il s'en fait vn enchainement malheureux qu'il faut éuiter. Vous comprenez bien par là, illustre Conseil, qu'après auoir animé contre nous trop d'ennemis, il ne faut point en appeller encores d'autres. Car enfin ceux que Monsieur le Cardinal nomme sont des ennemis, quelque masque d'amis qu'ils puissent porter. Ce sont les mesmes, ou qui ont souuent trahy la France, ou que j'ay vaincus. Quoy ceux qui nous ont voulu nuire, pourroient-ils nous protéger? Et ceux que j'ay battus pourroient-ils nous secourir? Non, non si mon bras me manque, nous n'auons plus besoin de leur aide; après le plus fort le plus faible ne feroit rien. Quand mesmes ils auroient au dessus de nous ce que nous auons au dessous d'eux, & que ce seroient des foudres propres à faire nostre vengeance; ne seroient-ils pas aussi dangereux à nostre ruine? Monsieur le grand Maistre l'a bien preueu; s'ils auoient vn pied dans le Royaume, il seroit dangereux qu'ils n'y

portassent l'autre. Ces instrumens de l'ambition & de la vanité d'Espagne, ne peuuent estre à la France que de tres dangereux ennemis. Ne nous seruons point, ie vous prie, d'amis qui nous donneroient bien moins à esperer qu'à craindre; & desquels les progresz nous seroient vne espee de gain qui nous causeroit autant de perte. Je ne vous dis point quel danger courroit le Roy de tomber en leurs mains s'ils estoient les plus forts. Combien s'est-il perdu de Princes & d'Estats par de semblables accidens. Outre que ce seroit le vray moyen d'animer contre nous toutes les forces du Royaume. Il n'est point de François qui sentans l'Estranger venir ne s'armast pour la defense de son Monarque, & pour son salut propre: tellement que pour vn renfort de quinze ou de vingt mil hommes tout au plus que nous ameneroient encore nos ennemis; nous verrions s'éleuer contre nous la France entiere, qui nous accableroit du nombre seulement de ses combatans. Perdons donques, illustre Conseil, cette pensée tout ensemble & dangereuse & criminelle; & vainquons avec plus d'honneur, ou succombons avec moins de honte. Nous ne sommes pas encores si desesperés que nous n'ayons plusieurs places à nostre seruice, & que nous ne puissions recevoir le secours de quelques Provinces. Vous mesmes, monsieur le Cardinal, vous dites que nos ennemis ne font que se defendre de la necessité. Si leur ardeur n'a peu iusques icy pousser plus auant, nous deuons esperer de la voir bien-toist ralentie. La generosité de tout vn peuple n'est pas de durée. Ce feu de paille a bien toist perdu son éclat & sa chaleur; & quoy que tout vn Parlement, que mon propre frere, & que plusieurs autres Chefs conduisent cette populace; Si tant de parties s'amolissent, il faudra necessairement que tout le Corps se relasche. Quand mesmes ils ne le feroient pas, & que Paris n'auroit que des Hectors & pas vn Paris, il nous faut estre des Achilles, & tirer plûtoist le secours de nostre valeur que de la lascheté de nos rebelles. Quand mesmes nous n'aurions point d'autre renfort, & qu'il nous faudroit combattre avec nos seules troupes, c'est assez. Alexandre autrefois n'en auoit gueres plus quand il entrepris la conqueste de la Perse.

Mr LE DVC D'ORLEANS.

Cette resolution est digne du courage de Mr le Prince, & s'il ne faut pas rendre le Roy aux Parisiens (quoy que ie croy que c'est le meilleur aduis) j'y consens.

LE CARDINAL.

C'est à quoy il se faut resoudre, si mon conseil ne se doit pas suiure.

LE CHANCELIER.

Illustre Conseil ma voye suit les vostres.

Mr DE LA MESLERAYE.

C'est le plus juste & le plus honorable.

*Par tout de leurs Conseils le Destin irrité
Abandonne leur vie à toute extremité:
Il n'est point pour eux de remede
Qui ne soit lasche ou malheureux;
Et leur experience cede
A tous les deux ensemble, ou bien à l'un des deux.*